

## Suspensjon av autorisasjon som helsepersonell

Når Statens helsetilsyn meiner at eit helsepersonell kan utgjere ein fare for pasienttryggleiken, vil vi vurdere å suspendere helsepersonellet. Det vil seie at vi mellombels tek autorisasjonen frå vedkommande medan vi behandlar ferdig tilsynssaka.

I suspensjonstida kan helsepersonellet ikkje drive i yrket sitt. Av omsyn til rettstryggleiken for helsepersonellet kan Helsetilsynet berre vedta suspensjon for seks månader, og det er berre høve til å forlengje suspensjonen éin gong med ytterlegare seks månader. I 2015 fatta Statens helsetilsyn 36 suspensjonsvedtak. I dei aller fleste tilfella der Statens helsetilsyn har gjort vedtak om suspensjon, endar tilsynssaka med at helsepersonellet mistar autorisasjonen.

### Vilkår for suspensjon

Den sentrale heimelen for suspensjon er helsepersonellova § 58. Lovregelen gir Statens helsetilsyn høve til å suspendere dersom det er grunn til å

tru at vilkåra for å kalle tilbake autorisasjonen er oppfylte. Vilkåret «grunn til å tro» inneber at lova ikkje stiller like strenge krav til bevis som ved endeleg vedtak om å kalle tilbake autorisasjon. Dette gir Statens helsetilsyn høve til å suspendere i tilfelle der det er uvisse kring saksforholdet, og det derfor er nødvendig å hente inn ytterlegare opplysningar før vi kan ta endeleg avgjerd i saka.

I tillegg må vurderinga vere at helsepersonellet er til fare for tryggleiken i helse- og omsorgstenesta. Det er ikkje krav om at helsepersonellet faktisk har utsett pasientar for fare. Det avgjerande er risikoen for at helsepersonellet i framtida kan utgjere ein fare for tryggleiken. Eit eksempel på at vilkåra er oppfylte, er når det er fare for at pasientar kan bli utsette for uforsvarlege hendingar dersom helsepersonellet får drive vidare i yrket sitt.

### I kva type sakar er suspensjon aktuelt?

Statens helsetilsyn vil ofte vurdere

suspensjon i tilfelle der det ligg føre opplysningar om at eit helsepersonell har eit alvorleg rusproblem og har møtt ruspåverka på jobb. Hendingar og saker knytte til rus er den vanlegaste årsaka til suspensjon. Suspensjon kan vidare vere aktuelt dersom helsepersonell har ei alvorleg sinnsliding, der nokon er mistenkt for å ha gjort straffbare handlingar, ved seksuelle overgrep overfor pasientar eller på grunn av alvorlege faglege feil. Faren for pasienttryggleiken er særleg stor når helsepersonellet har ein uklar arbeidssituasjon, for eksempel at han eller ho tek oppdrag gjennom vikarbyrå. I slike tilfelle er det ikkje sikkert at arbeidsgivaren er kjend med situasjonen, og det er derfor vanskelegare for arbeidsgivaren å følgje opp.

### Eksempel på saker om suspensjon

Fylkesmannen oppretta tilsynssak etter å ha fått ei uromelding om at ein sjukepleiar hadde alkoholproblem og rusa seg på morfinpreparat. Sjuke-



## Suspensjon av autorisasjon som helsepersonell

pleiaren blei seinare dømd ved tilståingsdom for å ha stole vanedannende legemiddel frå arbeidsplassen sin. Statens helsetilsyn la opplysningane i dommen til grunn. Vi meinte det var grunn til å tru at sjukepleiaren hadde eit rusproblem som gjorde sjukepleiaren ueigna til å drive forsvarleg i yrket sitt, og meinte at

sjukepleiaren var ein fare for tryggleiken i helsetenesta. Da vi i Statens helsetilsyn vurderte å suspendere vedkommande, la vi vekt på at det var ukjent om sjukepleiaren framleis var i arbeid eller var sjukmeld.

Statens helsetilsyn suspenderte autorisasjonen til ein kirurg som blant

anna hadde brukt utradisjonelle operasjonsmetodar. Vi grunn gav suspensjonen med at kirurgen hadde gitt uforsvarleg helsehjelp fleire gonger og vist mangel på innsikt. Da vi vurderte om kirurgen var ein fare for tryggleiken, blei det lagt vekt på at arbeidssituasjonen for kirurgen på suspensjonstidspunktet var ukjent.